



險險捉著大鱸鰻

大水過後，外崗圳个圳水濂到腳目珠恁高。阿國同阿寶兩兄弟巡到這位，目金金仔緊看，圳水汶汶，無麼个清淨，國寶兩兄弟行較兼圳溝脣，頭探探仔看入汶水肚。看圳溝肚有魚仔蝦公無？好捉轉去煮來做餐，分透長年瘦瘦个胃腸、凹凹个肚屎一息仔營養同燒暖！

當有摸螺挖蟹、釣魚撈蝦經驗个兄弟，看著汶水面項，浮起一旋(qion)一旋(qion)个水波，魚仔烏烏个背同蝦公青青个蝦公夾，一下浮起來一下沉下去。「這滿，好彩咁哪！」，圳溝肚著(diauˋ)有當多个魚仔同蝦公，阿國同老弟定定仔，輕手輕腳行下圳溝肚。

日頭箭過、晷過个圳溝水溫燒溫燒仔！裡肚不管麼个魚仔蝦公通體暈哆(deˋ)暈哆(deˋ)，手一伸，毋會奮、當該食就摻佢兜捉落手、放入袋，國寶兩兄弟無半點鐘，就摻袋仔裝到淦淦。兩兄弟笑微微仔个面，在日頭个映照下，紅蓮紅蓮个色，實在當好看。

「阿國，你看，該係麼个？」，阿寶著驚一下，面頭前，一條烏烏長長像臭青嫲樣个東西，無停無動，攞(laiˋ)在該位。「該係鱸鰻，大鱸鰻！」阿國細細聲仔，當驚吵著鱸鰻，使一下眼角，示意阿寶毋好停動！

阿寶毋敢停動，目金金仔看等鱸鰻，驚佢瀉走！阿國拉等褲腳、躡腳尾行到圳溝脣，自家蹶上圳溝，行到圳溝路面，再攀下圳溝，兩腳企好，雙手弓出抓(saˋ)魚仔个姿勢，阿國同阿寶頭前背尾兩頭準備好勢，一步一步行兼鱸鰻！兩儕同時兩手一揪，滑滑个大鱸鰻，一下對國寶兩兄弟个手項溜走，跔等外崗圳走到無魂無影。兩兄弟逐到源頭，你看佢，佢看你，就係看毋著該條大鱸鰻！淨留下鱸鰻黏黏浹浹个馱，在國寶兩兄弟个手巴掌、鼻公肚。

有成時發夢，佢兜還會講「還打爽！險險捉著大鱸鰻。」

作者：邱一帆

☆詞彙學習☆

【濂】liamˋ：水位降低。

【腳目珠】giogˋ mugˋ zuˋ：腳踝。

【汶汶】vunˋ vunˋ：混濁貌。

【好彩】hoˋ coiˋ：好運氣。

【通體】tungˋ tiˋ：大都。

【當該食】dongˋ goiˋ siidˋ：很容易。

【臭青嫲】cu qiangˋ maˋ：臭青母，蛇的一種。

【攞】laiˋ／laiˋ：本指躺臥，此處指靜止不動。

【躡腳尾】ne giogˋ miˋ：墊起腳尖。

【行兼】hangˋ giamˋ：走近。

【馱】hienˋ：氣味。

【有成時】iuˋ sangˋ siiˋ：有時候。

☆文法學習☆

【無……就……】沒有……就……。

例1：佢無上班，就去做社區服務。（他沒有上班，就去做社區服務。）

例2：佢無田，就去同人賺一垵田來耕。（他沒有田，就去跟人家租一塊田來耕種。）